

NO. SOALAN:489

PEMBERITAHUAN PERTANYAAN DEWAN RAKYAT

PERTANYAAN : BUKAN LISAN

**DARIPADA : YB LAKSAMANA PERTAMA MOHAMAD
IMRAN BIN ABD HAMID (B) [LUMUT]**

SOALAN :

**YB Laksamana Pertama Mohamad Imran bin Abd Hamid (B)
[Lumut] minta PERDANA MENTERI menyatakan mengapa
Rancangan Rumah Rakyat oleh PR1MA gagal dilaksanakan di Seri
Manjung dalam Parlimen Lumut setelah ditawarkan kepada Koperasi
Putrajaya.**

JAWAPAN: YB DATO'SERI DR. SHAHIDAN BIN KASSIM,
MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, PR1MA tidak pernah memilih, melantik atau memberi kontrak kepada mana-mana agen, koperasi atau pihak ketiga bagi pihaknya seperti urusan melantik kontraktor atau pemaju. PR1MA berurusan secara terus dengan pemaju dan kontraktor dalam sebarang urusan berkaitan pembangunannya. Oleh yang demikian PR1MA tidak pernah melantik Koperasi Putrajaya khususnya projek di Seri Manjung atau mana-mana koperasi lain dalam urusan berkaitan pembangunan projeknya.

Malahan PR1MA pernah mewar-warkan kepada umum melalui media massa seperti laman web dan akhbar tempatan supaya orang awam tidak terpedaya dengan mana-mana pihak ketiga yang mengaku telah dilantik sebagai agen PR1MA. Selain itu, PR1MA tidak mengutip sebarang bentuk deposit daripada pemohon rumah PR1MA sebagai bayaran untuk mendapatkan rumah bagi projeknya. PR1MA juga tidak mengutip sebarang wang deposit atau sumbangan daripada mana-mana pihak untuk melaksanakan pembangunan rumahnya.

Ini adalah selaras dengan Akta PR1MA 2012 yang telah menggariskan PR1MA untuk merancang, membangun, membina, menjual dan menyenggara perumahan berkualiti berkonsepkan gaya hidup moden bagi penduduk berpendapatan sederhana yang tinggal di kawasan bandar dan pinggiran bandar.

Namun begitu PR1MA sentiasa mengalu-alukan kerjasama antara PR1MA dan mana-mana entiti korporat yang layak untuk menjadi vendor PR1MA bagi merealisasikan pembangunannya.

Sehubungan itu, PR1MA telah mewujudkan sebuah sistem khusus untuk menyelaras maklumat pemaju, pembekal dan konsultan bagi urusan pelantikannya. Semua pemaju, pembekal dan konsultan swasta yang berminat untuk menjalinkan kerjasama ini dikehendaki mendaftar di bawah Program Pendaftaran Vendor secara talian (online) melalui laman web PR1MA www.pr1ma.my. Melalui sistem pendaftaran ini, PR1MA akan meneliti pemaju, pembekal dan konsultan swasta yang berkelayakan berdasarkan garis panduan yang telah ditetapkan PR1MA untuk memastikan kelancaran pelaksanaan pembangunannya tidak tergendala.

Sekian. Terima kasih.